

## ॥चतुर्थः प्रश्नः॥

### ॥तैत्तिरीयसंहितायां प्रथमकाण्डे चतुर्थः प्रश्नः॥

आ ददे॑ ग्रावा॑स्यध्वर॑कृद् दे॒वेभ्यो॑ गम्भीर॑मिमम॑ध्वरं कृ॒ध्युत्तमे॑न  
प॒विनेन्द्रा॑य॒ सोम॑ꣳ सु॒षुतं॒ मधु॑मन्तं॒ पय॑स्वन्तं॒ वृष्टि॑वनि॒मिन्द्रा॑य  
त्वा वृ॒त्रघ्न॑ इन्द्रा॑य॒ त्वा वृ॒त्रतुर॑ इन्द्रा॑य॒ त्वाऽभि॑माति॒घ्न इन्द्रा॑य  
त्वाऽऽदि॒त्यव॑न्त॒ इन्द्रा॑य॒ त्वा वि॒श्वदै॑व्यावते॒ श्वात्राः॑ स्थं वृ॒त्रतुरो॑  
राधो॑गूर्ता अ॒मृत॑स्य॒ पत्नी॑स्ता दे॒वीर्दे॒वत्रे॑मं य॒ज्ञं ध॒त्तोप॑हृताः॒ सोम॑स्य  
पि॒बतो॑प॒हृतो॑ यु॒ष्माक॑ꣳ (१)

सोमः॑ पि॒बतु॒ यत्ते॑ सोम॒ दि॒वि ज्योति॑र्यत् पृ॒थिव्यां  
यदुरा॑व॒न्तरि॑क्षे॒ तेना॒स्मै यज॑माना॒योरु॒ रा॒या कृ॒ध्यधि॑ दा॒त्रे वो॑चो  
धिष॑णे वी॒डू स॒ती वी॑डयेथा॒मूर्जं॑ दधाथा॒मूर्जं॑ मे ध॒त्तं मा॑ वाꣳ  
हिꣳसिषं॒ मा मा॑ हिꣳसिष्टं॒ प्राग॑पा॒गुद॑ग॒धरा॑क्तास्त्वा॒ दिश॑ आ  
धा॑व॒न्त्वम्ब॒ नि ष्व॑र। यत्ते॑ सो॒मादा॑भ्यं॒ नाम॒ जागृ॑वि॒ तस्मै॑ ते सोम॒  
सोमा॑य॒ स्वाहा॑॥ (२)

युष्माकꣳ स्वर॒ यत्ते॑ नव॑ च॥ \_\_\_\_\_ [१]

वा॒चस्प॑तये॒ पव॑स्व वा॒जिन् वृषा॑ वृ॒ष्णो अꣳशु॑भ्यां॒ गर्भ॑स्ति॒पूतो॑  
दे॒वो दे॒वानां॑ प॒वित्र॑मसि॒ येषां॑ भा॒गोऽसि॑ तेभ्य॑स्त्वा॒ स्वां कृ॑तोऽसि॒  
मधु॑मतीर्न॒ इष॑स्कृ॒धि वि॒श्वेभ्य॑स्त्वेन्द्रि॒येभ्यो॑ दि॒व्येभ्यः॑ पा॒र्थिवे॑भ्यो  
मन॑स्त्वाष्टृ॒र्वन्तरि॑क्ष॒मन्वि॑हि॒ स्वाहा॑ त्वा सु॒भवः॒ सूर्या॑य दे॒वेभ्य॑स्त्वा

मरीचिपेभ्य॑ ए॒ष ते॒ योनिः॑ प्रा॒णाय॑ त्वा॥ (३)

वाचः सप्तचत्वारिंशत्॥ [२]

उ॒प॒या॒म॒गृ॒ही॒तोऽस्य॑न्तर्य॑च्छ म॒घव॑न् पा॒हि सोम॑मुरु॒ष्य रा॒यः  
स॒मिषो॑ यज॒स्वान्तस्ते॑ द॒धामि॑ द्यावा॑पृथि॒वी अ॒न्तरु॑र्वन्तरि॑क्ष॒  
स॒जोषा॑ दे॒वैरव॑रैः परै॑श्चान्तर्या॒मे म॑घवन् मादयस्व॒ स्वां कृ॑तोऽसि  
मधु॑मतीर्न॒ इष॑स्कृधि॒ विश्वे॑भ्यस्त्वेन्द्रि॒येभ्यो॑ दि॒व्येभ्यः॑ पार्थि॒वेभ्यो॑  
मन॑स्त्वाष्ट्रुर्वन्तरि॑क्षमन्वि॒हि स्वाहा॑ त्वा सु॒भवः॑ सू॒र्याय॑ दे॒वेभ्य॑स्त्वा  
मरीचिपेभ्य॑ ए॒ष ते॒ योनि॑रपा॒नाय॑ त्वा॥ (४)

दे॒वेभ्यः॑ सप्त च॑॥ [३]

आ वा॑यो भूष शुचिपा॒ उप॑ नः स॒हस्रं॑ ते नि॒युतो॑ विश्व॒वार।  
उपो॑ ते अ॒न्यो म॒द्यम॑यामि॒ यस्य॑ देव दधिषे पू॒र्वपे॑यम्॥  
उ॒प॒या॒म॒गृ॒ही॒तोऽसि॑ वा॒यवे॒ त्वेन्द्र॑वायू इ॒मे सु॒ताः। उप॑ प्रयो॑भिरा  
ग॒न्तमि॑न्द॒वो वा॒मु॒शन्ति॑ हि॥ उ॒प॒या॒म॒गृ॒ही॒तोऽसी॑न्द्रवा॒युभ्यां॑ त्वैष ते॒  
योनिः॑ स॒जोषा॑भ्यां त्वा॥ (५)

आ वा॑यो त्रिचत्वारिंशत्॥ [४]

अ॒यं वा॑ मि॒त्राव॑रुणा सु॒तः सोम॑ ऋ॒तावृ॑धा। ममेदि॒ह श्रु॑त॒  
हव॑म्। उ॒प॒या॒म॒गृ॒ही॒तोऽसि॑ मि॒त्राव॑रुणाभ्यां त्वैष ते॒ योनि॑र् ऋ॒तायु॑-  
भ्यां॑ त्वा॥ (६)

अयं वाँ विश्व॑तिः॥ \_\_\_\_\_[५]

या वाँ क॒शा म॒धुम॑त्य॒श्विना॑ स॒नृता॑वती। तया॑ य॒ज्ञं मि॑मिक्षतम्।  
उ॒प॒या॒मगृ॑हीतोऽस्य॒श्विभ्याँ॑ त्वैष ते॒ योनि॑र्मा॒ध्वीभ्याँ॑ त्वा॥ (७)

या वाँम॑ष्टादंश॥ \_\_\_\_\_[६]

प्रा॒त॒र्युजौ॑ वि मु॒च्येथा॑म॒श्विना॑वेह गच्छ॒तम्। अ॒स्य सोम॑स्य  
पी॒तये॑॥ उ॒प॒या॒मगृ॑हीतोऽस्य॒श्विभ्याँ॑ त्वैष ते॒ योनि॑र॒श्विभ्याँ॑ त्वा॥ (८)

प्रा॒त॒र्युजा॑वेका॒न्नवि॑शतिः॥ \_\_\_\_\_[७]

अ॒यं वे॒नश्चौ॑दय॒त् पृ॒थि॒ज्जि॑गर्भा॒ ज्योति॑र्जरायू रज॑सो वि॒माने॑।  
इ॒मम॑पा॒ सं॒ङ्ग॒मे सूर्य॑स्य॒ शिशुं॑ न वि॒प्रा म॑तिभी॒ रिह॑न्ति॥  
उ॒प॒या॒मगृ॑हीतोऽसि॒ शण्डा॑य त्वैष ते॒ योनि॑र्वी॒रता॑ पाहि॥ (९)

अ॒यं वे॒नः पञ्च॑वि॒शतिः॥ \_\_\_\_\_[८]

तं प्र॒त्नथा॑ पूर्॒वथा॑ वि॒श्वथे॑मथा॒ ज्येष्ठ॑ता॒तिं ब॒र्हिष॑दः सु॒व॒र्विद॑  
प्रती॒चीनं॑ वृ॒जनं॑ दो॒हसे॑ गि॒राऽऽशुं॑ जय॑न्त॒मनु॑ यासु॒ वर्ध॑से।  
उ॒प॒या॒मगृ॑हीतोऽसि॒ मर्का॑य त्वैष ते॒ योनिः॑ प्र॒जाः पा॑हि॥ (१०)

त॒ प॒ञ्चवि॑शतिः॥ \_\_\_\_\_[९]

ये दे॒वा दि॒व्येका॑दश॒ स्थ पृ॑थि॒व्याम॑ध्येका॑दश॒ स्थाऽप्सु॑षदो॑  
महि॒नैका॑दश॒ स्थ ते॑ दे॒वा य॒ज्ञमि॑मं जु॒षध्व॑मु॒पया॑मगृ॒हीतो॑-  
ऽस्या॒ग्रय॑णो॑ऽसि॒ स्वा॑ग्रय॒णो जि॒न्वं य॒ज्ञं जि॒न्वं य॒ज्ञप॑तिम॒भि

सर्वना पाहि विष्णुस्त्वां पातु विशं त्वं पाहीन्द्रियेणैष ते  
योनिर्विश्वेभ्यस्त्वा देवेभ्यः॥ (११)

ये देवास्त्रिचत्वारिंशत्॥ [१०]

त्रिंशत् त्रयश्च गणिनो रुजन्तो दिवः रुद्राः पृथिवीं च  
सचन्ते। एकादशासौ अप्सुषदः सुतः सोमं जुषन्ताः सर्वनाय  
विश्वे॥ उपयामगृहीतोऽस्याग्रयणोऽसि स्वाग्रयणो जिन्व यज्ञं जिन्व  
यज्ञपतिमभि सर्वना पाहि विष्णुस्त्वां पातु विशं त्वं पाहीन्द्रियेणैष  
ते योनिर्विश्वेभ्यस्त्वा देवेभ्यः॥ (१२)

त्रिंशद् द्विचत्वारिंशत्॥ [११]

उपयामगृहीतोऽसीन्द्राय त्वा बृहद्वते वयस्वत उक्थायुवे  
यत् तं इन्द्र बृहद्वयस्तस्मै त्वा विष्णावे त्वैष ते योनिरिन्द्राय  
त्वोक्थायुवे॥ (१३)

उपयामगृहीतो द्वाविंशतिः॥ [१२]

मूर्धानं दिवो अरतिं पृथिव्या वैश्वानरमृताय जातमग्निम्।  
कविः सम्राजमतिथिं जनानामासन्ना पात्रं जनयन्त देवाः॥  
उपयामगृहीतोऽस्यग्रये त्वा वैश्वानराय ध्रुवोऽसि ध्रुवक्षितिर्ध्रुवाणां  
ध्रुवतमोऽच्युतानामच्युतक्षित्तम एष ते योनिरग्रये त्वा  
वैश्वानराय॥ (१४)

मूर्धानं पञ्चत्रिंशत्॥ [१३]

मधुश्च माधवश्च शुक्रश्च शुचिश्च नभश्च नभस्यश्चेषश्चोर्जश्च  
सहश्च सहस्यश्च तपश्च तपस्यश्चोपयामगृहीतोऽसि सु॒सर्पो-  
ऽस्य॑ हस्पत्याय॑ त्वा॥ (१५)

मधु॑न्नि॒शत्॥ [१४]

इन्द्रा॑ग्नी आ ग॑तं सु॒तं गी॒र्भिर्नभो॑ वरे॑ण्यम्। अ॒स्य पा॑तं  
धि॒येषि॑ता॥ उ॒प॒या॒मगृ॑हीतोऽसीन्द्रा॒ग्निभ्या॑ त्वैष ते योनि॑रिन्द्रा॒ग्नि-  
भ्या॑ त्वा॥ (१६)

इन्द्रा॑ग्नी वि॒शतिः॥ [१५]

ओमा॑सश्चर॒षणीधृ॑तो विश्वे॑ देवा॒स आ ग॑त। दा॒श्वा॒सो  
दा॒शुषः॑ सु॒तम्॥ उ॒प॒या॒मगृ॑हीतोऽसि विश्वे॑भ्यस्त्वा दे॒वेभ्य॑ ए॒ष ते  
योनि॑र्विश्वे॑भ्यस्त्वा दे॒वेभ्यः॑॥ (१७)

इन्द्रा॑ग्नी ओमा॑सो वि॒शतिर्वि॒शतिः॥ [१६]

म॒रुत्व॑न्तं वृष॒भं वा॑वृ॒धानम॑क॒वारिं दि॒व्यं शा॒समिन्द्र॑म्।  
वि॒श्वा॒साह॑मव॒से नू॒तना॑यो॒ग्रं स॒होदा॑मि॒ह तं हु॑वेम॥  
उ॒प॒या॒मगृ॑हीतोऽसीन्द्रा॒य त्वा म॒रुत्व॑न्त ए॒ष ते योनि॑रिन्द्रा॒य  
त्वा म॒रुत्व॑न्ते॥ (१८)

म॒रुत्व॑न्तं प॒ङ्क्तिः॑ शतिः॥ [१७]

इन्द्र॑ मरुत्व इ॒ह पा॑हि सोमं यथा॑ शा॒र्या॒ति अपि॑बः सु॒तस्य॑।  
तव॑ प्रणी॑ती तव॑ शूर शर्म॑न्ना वि॒वास॑न्ति क॒वयः॑ सुय॒ज्ञाः॥

उ॒प॒या॒म॒गृ॒ही॒तो॒ऽसी॒न्द्रा॒य॒ त्वा म॒रु॒त्वं॑त ए॒ष ते॒ योनि॒रिन्द्रा॒य॒ त्वा  
म॒रु॒त्वं॑ते॥ (१९)

इन्द्रैकाग्रत्रिंशत्॥ [१८]

म॒रु॒त्वा॑ इन्द्र वृष॒भो रणा॑य॒ पिबा॒ सोम॑मनुष्व॒धं म॑दाय। आ  
सि॒ञ्च॒स्व ज॒ठरे॒ मध्व॑ ऊ॒र्मिं त्व॑ राजा॑ऽसि प्र॒दिवः॑ सु॒ताना॑म्॥  
उ॒प॒या॒म॒गृ॒ही॒तो॒ऽसी॒न्द्रा॒य॒ त्वा म॒रु॒त्वं॑त ए॒ष ते॒ योनि॒रिन्द्रा॒य॒ त्वा  
म॒रु॒त्वं॑ते॥ (२०)

इन्द्रं मरुत्वो मरुत्वानेकाग्र त्रिंशदेकाग्र त्रिंशत्॥ [१९]

म॒हा॑ इन्द्रो॒ य ओज॑सा प॒र्जन्यो॑ वृष्टि॒मा इ॒वा  
स्तोमै॑र्व॒थ्सस्य॑ वावृ॒धे॥ उ॒प॒या॒म॒गृ॒ही॒तो॒ऽसि महे॒न्द्राय॑ त्वैष ते॒  
योनि॑र्महे॒न्द्राय॑ त्वा॥ (२१)

महानेकाग्रविंशतिः॥ [२०]

म॒हा॑ इन्द्रो॒ नृ॒वदा॑ च॒र॒षणि॑प्रा उ॒त द्वि॒ब॒र्हा अ॒मि॒नः  
सहो॑भिः। अ॒स्मद्रि॑य॒ग्वावृ॒धे वी॒र्या॑यो॒रुः पृथुः॑ सु॒कृतः॑ क॒र्तृभि॑र्भूत्॥  
उ॒प॒या॒म॒गृ॒ही॒तो॒ऽसि महे॒न्द्राय॑ त्वैष ते॒ योनि॑र्महे॒न्द्राय॑ त्वा॥ (२२)

महानृवत्पट्विंशतिः॥ [२१]

क॒दा च॒न स्त॒रीर॑सि॒ नेन्द्र॑ स॒श्वसि॑ दा॒शुषे॑। उ॒पो॒पे॒न्नु  
म॑घ॒वन् भू॒य इ॒न्नु ते॒ दानं॑ दे॒वस्य॑ पृ॒च्यते॥ उ॒प॒या॒म॒गृ॒ही॒तो॒-  
ऽस्यादि॒त्येभ्य॑स्त्वा॥ क॒दा च॒न प्र यु॑च्छ॒स्यु॒भे नि पा॑सि॒ जन्म॑नी।

तुरीयादित्यं सवनं त इन्द्रियमा तस्थावमृतं दिवि॥ यज्ञो  
 देवानां प्रत्येति सुम्नमादित्यासो भवता मृडयन्तः। आ वोऽर्वाचीं  
 सुमतिर्ववृत्याद॥ होश्चिद्या वरिवोवित्तरासत्॥ विवस्व आदित्येष  
 ते सोमपीथस्तेन मन्दस्व तेन तृप्य तृप्यास्म ते वयं तर्पयितारो  
 या दिव्या वृष्टिस्तया त्वा श्रीणामि॥ (२३)

वः सप्तविंशतिश्च॥ [२३]

वाममद्य सवितर्वाममु श्वो दिवेदिवे वाममस्मभ्यं सावीः।  
 वामस्य हि क्षयस्य देव भूररया धिया वामभाजः स्याम॥  
 उपयामगृहीतोऽसि देवाय त्वा सवित्रे॥ (२४)

वामं चतुर्विंशतिः॥ [२३]

अदब्धेभिः सवितः पायुभिर्द्वं शिवेभिर्द्य परि पाहि नो  
 गयम्। हिरण्यजिह्वः सुविताय नव्यंसे रक्षा मार्किर्नो अघशंस  
 ईशत॥ उपयामगृहीतोऽसि देवाय त्वा सवित्रे॥ (२५)

अदब्धेभिस्त्रयोविंशतिः॥ [२४]

हिरण्यपाणिमृतये सवितारमुप ह्वये। स चेत्ता देवता पदम्॥  
 उपयामगृहीतोऽसि देवाय त्वा सवित्रे॥ (२६)

हिरण्यपाणिं चतुर्दश॥ [२५]

सुशर्माऽसि सुप्रतिष्ठानो बृहदुक्षे नम एष ते योनिर्विश्वेभ्यस्त्वा  
 देवेभ्यः॥ (२७)

सुशर्मा द्वादशः॥ [२६]

बृहस्पतिसुतस्य त इन्द्रो इन्द्रियावतुः पत्नीवन्तं ग्रहं  
गृह्णाम्यग्ना(३)इ पत्नीवा(३)ः सजूर्देवेन त्वष्ट्रा सोमं पिब  
स्वाहा॥ (२८)

बृहस्पतिसुतस्य पञ्चदशः॥ [२७]

हरिरसि हारियोजनो हर्योः स्थाता वज्रस्य भर्ता पृश्नेः प्रेता  
तस्य ते देव सोमेष्ट्यंजुषः स्तुतस्तोमस्य शस्तोक्थस्य हरिवन्तं  
ग्रहं गृह्णामि हुरीः स्थ हर्योर्धानाः सहसोमा इन्द्राय स्वाहा॥ (२९)

हरिः पञ्चिंशतिः॥ [२८]

अग्र आयूर्ऽपि पवस आ सुवोर्जमिषं च नः। आरे बाधस्व  
दुच्छुनाम्॥ उपयामगृहीतोऽस्यग्रये त्वा तेजस्वत एष ते योनिर्ग्रये  
त्वा तेजस्वते॥ (३०)

अग्र आयूर्ऽपि त्रयोविंशतिः॥ [२९]

उत्तिष्ठन्नोजसा सह पीत्वा शिप्रे अवेपयः। सोममिन्द्र चमू  
सुतम्॥ उपयामगृहीतोऽसीन्द्राय त्वौजस्वत एष ते योनिरिन्द्राय  
त्वौजस्वते॥ (३१)

उत्तिष्ठन्नेकविंशतिः॥ [३०]

तरणिर्विश्वदर्शतो ज्योतिष्कृदसि सूर्य। विश्वमा भांसि



रोच॑नम्॥ उ॒प॒या॒म॒गृ॒ही॒तोऽसि॑ सूर्या॑य त्वा॒ भ्राज॑स्वत ए॒ष ते॒ योनिः॑  
सूर्या॑य त्वा॒ भ्राज॑स्वते॥ (३२)

तर॑णिर्वि॒शतिः॑॥ [३१]

आ प्या॑यस्व मदि॒न्तम् सोम॑ विश्वा॑भिरू॒तिभिः॑। भवा॑ नः  
सप्र॑थस्तमः॥ (३३)

आ प्या॑यस्व नव॑॥ [३२]

ई॒युष्टे॑ ये पू॒र्व॒तरा॑मप॑श्यन् व्यु॒च्छ॒न्ती॑मु॒षसं॑ म॒र्त्यासः॑।  
अ॒स्माभि॑रू॒ नु प्र॑ति॒चक्ष्या॑ऽभू॒दो ते य॑न्ति॒ ये अ॑प॒रीषु॑ प॒श्यान्॑॥ (३४)

ई॒युरेका॑न्नवि॒शतिः॑॥ [३३]

ज्योति॑ष्मतीं त्वा सादयामि ज्योति॑ष्कृतं त्वा सादयामि  
ज्योति॑र्विदं त्वा सादयामि भास्व॑तीं त्वा सादयामि ज्वल॑न्तीं  
त्वा सादयामि मल्म॑ला॒भव॑न्तीं त्वा सादयामि दी॒प्य॑मानां  
त्वा सादयामि रोच॑मानां त्वा सादया॒म्यज॑स्रां त्वा सादयामि  
बृ॒ह॒ज्योति॑षं त्वा सादयामि बो॒ध॑यन्तीं त्वा सादयामि जाग्र॑तीं त्वा  
सादयामि॥ (३५)

ज्योति॑ष्मती॒ प॒द्वि॒शतिः॑॥ [३४]

प्र॒या॒साय॑ स्वाहा॑ऽऽया॒साय॑ स्वाहा॑ वि॒या॒साय॑ स्वाहा॑  
सं॒या॒साय॑ स्वाहा॑ऽद्या॒साय॑ स्वाहा॑ऽव॒या॒साय॑ स्वाहा॑ शु॒चे स्वाहा॑  
शोका॑य॒ स्वाहा॑ तप्य॑त्वै स्वाहा॑ तप॑ते स्वाहा॑ ब्र॒ह्म॒ह॒त्यायै॑ स्वाहा॑

सर्वस्मै स्वाहा॥ (३६)

प्रयासाय चतुर्विंशतिः॥ [३५]

चित्तं सन्तानेन भवं यक्रा रुद्रं तनिम्ना पशुपतिं  
स्थूलहृदयेनाग्निं हृदयेन रुद्रं लोहितेन शर्वं मत्स्राभ्यां  
महादेवमन्तःपार्श्वेनौषिष्ठहन् शिङ्गीनिकोश्याभ्याम्॥ (३७)

चित्तमष्टादश॥ [३६]

आ तिष्ठ वृत्रहन् रथं युक्ता ते ब्रह्मणा हरीं। अर्वाचीनं सु ते  
मनो ग्रावा कृणोतु वग्मुनां॥ उपयामगृहीतोऽसीन्द्राय त्वा षोडशिनं  
एष ते योनिरिन्द्राय त्वा षोडशिनं॥ (३८)

आ तिष्ठ षड्विंशतिः॥ [३७]

इन्द्रमिद्धरीं वहतोऽप्रतिधृष्टशवसमृषीणां च स्तुतीरुपं यज्ञं  
च मानुषाणाम्॥ उपयामगृहीतोऽसीन्द्राय त्वा षोडशिनं एष ते  
योनिरिन्द्राय त्वा षोडशिनं॥ (३९)

इन्द्रमित् त्रयोविंशतिः॥ [३८]

असावि सोमं इन्द्र ते शविष्ठ धृष्णवा गंहि। आ त्वां  
पृणक्तिन्द्रियं रजः सूर्यं न रश्मिभिः॥ उपयामगृहीतोऽसीन्द्राय  
त्वा षोडशिनं एष ते योनिरिन्द्राय त्वा षोडशिनं॥ (४०)

असावि समविंशतिः॥ [३९]

सर्वस्य प्रतिशीवरी भूमिस्त्वोपस्थ आधिता स्योनाऽस्मै

सुषदा भव यच्छास्मै शर्म सप्रथाः॥ उपयामगृहीतोऽसीन्द्राय त्वा  
षोडशिन एष ते योनिरिन्द्राय त्वा षोडशिनै॥ (४१)

सर्वस्य षड्विंशतिः॥ [४०]

महा९ इन्द्रो वज्रबाहुः षोडशी शर्म यच्छतु। स्वस्ति नो मघवां  
करोतु हन्तु पाप्मानं योऽस्मान् द्वेष्टि॥ उपयामगृहीतोऽसीन्द्राय त्वा  
षोडशिन एष ते योनिरिन्द्राय त्वा षोडशिनै॥ (४२)

सर्वस्य महान्यषड्विंशतिः षड्विंशतिः॥ [४१]

सजोषां इन्द्र सगणो मरुद्भिः सोमं पिब वृत्रहञ्छूर विद्वान्।  
जहि शत्रूँ रप मृधो नुदस्वाऽथाभयं कृणुहि विश्वतो नः॥  
उपयामगृहीतोऽसीन्द्राय त्वा षोडशिन एष ते योनिरिन्द्राय त्वा  
षोडशिनै॥ (४३)

सजोषाँस्त्रिंशत्॥ [४२]

उदु त्यं जातवेदसं देवं वहन्ति केतवः। दृशे विश्वाय सूर्यम्॥  
चित्रं देवानामुदगादनीकं चक्षुर्मित्रस्य वरुणस्याग्नेः। आप्रा द्यावा-  
पृथिवी अन्तरिक्षँ सूर्य आत्मा जगतस्तस्थुषश्च॥ अग्ने नय सुपथां  
राये अस्मान् विश्वानि देव वयुनानि विद्वान्। युयोध्यस्मञ्जुहुराणमेनो  
भूयिष्ठां ते नम उक्तिं विधेम॥ दिवं गच्छ सुवः पत रूपेणं (४४)

वो रूपमभ्यैमि वयंसा वयः। तुथो वो विश्ववेदा वि भजतु

वर्षिष्ठे अधि नाके॥ एतत् ते अग्ने राध ऐति सोमच्युतं तन्मित्रस्य  
 पथा नयर्तस्य पथा प्रेतं चन्द्रदक्षिणा यज्ञस्य पथा सुविता  
 नयन्तीर्ब्राह्मणमद्य राध्यासमृषिमार्षेयं पितृमन्तं पैतृमत्यं  
 सुधातुदक्षिणं वि सुवः पश्य व्यन्तरिक्षं यतस्व सदस्यैरस्मद्वात्रा  
 देवत्रा गच्छतु मधुमतीः प्रदातारमा विशतानवहायास्मान् देवयानेन  
 पथेतं सुकृतां लोके सीदत तन्नः सङ्स्कृतम्॥ (४५)

रूपेण सदस्यैरष्टादश च॥ [४३]

धाता रातिः संवितेदं जुषन्तां प्रजापतिर्निधिपतिर्नो अग्निः।  
 त्वष्टा विष्णुः प्रजयां स० रराणो यजमानाय द्रविणं दधातु॥ समिन्द्र  
 णो मनसा नेषि गोभिः स० सूरिभिर्मघवन्थस० स्वस्त्या। सं ब्रह्मणा  
 देवकृतं यदस्ति सं देवानां० सुमत्या यज्ञियानाम्॥ सं वर्चसा  
 पयसा सं तनूभिरगन्महि मनसा स० शिवेन। त्वष्टा नो अत्र  
 वरिवः कृणो- (४६)

त्वनुं मार्ष्टुं तनुवो यद्विलिष्टम्॥ यदद्य त्वां प्रयति यज्ञे  
 अस्मिन्नग्ने होतारमवृणीमहीह। ऋधगया० इधगुताशमिष्ठाः प्रजानन्  
 यज्ञमुपयाहि विद्वान्॥ स्वगा वो देवाः सदनमकर्म य आजग्म  
 सवनेदं जुषाणाः। जक्षिवा० सः पपिवा० संश्च विश्वेऽस्मे धत्त  
 वसवो वसूनि॥ यानाऽवह उशतो देव देवान्तान् (४७)

प्रेरय स्वे अग्ने सधस्थे। वहमाना भरमाणा हवी०षि वसुं

घ॒र्म दि॒व॒मा तिष्ठ॑तानु॑॥ य॒ज्ञं य॒ज्ञं गच्छ॑ य॒ज्ञप॑तिं गच्छ॑ स्वां योनिं  
गच्छ॑ स्वा॒हृष॑ ते य॒ज्ञो य॑ज्ञपते स॒हसू॑क्तवाकः सु॒वीरः॑ स्वाहा दे॒वा  
गा॒तुवि॑दो गा॒तुं वि॒त्वा गा॒तुमि॑त मन॑सस्पत इ॒मं नो॑ दे॒व दे॒वेषु॑  
य॒ज्ञं स्वा॒हा वा॒चि स्वा॒हा वा॒र्ते धाः॑॥ (४८)

कृणोतु तान्ष्टाचत्वारिंशच्च॥ [४४]

उ॒रु॑ हि रा॒जा वरु॑णश्च॒कार॒ सूर्या॑य पन्था॒मन्वे॑त॒वा उ॑। अ॒पदे॒  
पादा॒ प्रति॑धातवेऽक॒रुता॑प॒व॒क्ता हृ॑दया॒विधि॑श्चित्॥ श॒तं ते॑ रा॒जन्  
भि॒षजः॑ स॒हस्र॑मु॒र्वी ग॑म्भी॒रा सु॑म॒तिष्ठे॑ अस्तु। बा॒धस्व॒ द्वेषो॑ निर्ऋ॒तिं  
परा॒चैः कृ॑तं चि॒देनः॒ प्र मु॑मु॒गध्य॑स्मत्॥ अ॒भिष्टि॑तो वरु॑णस्य॒ पाशो॑-  
ऽग्ने॒रनी॑कम॒प आ वि॑वेश। अपा॑ नपात् प्र॒तिर॑क्ष॒न्नसुर्य॑ दमे॑दमे (४९)

स॒मिधं॑ यक्ष्य॒ग्ने॥ प्र॒ति ते॑ जि॒ह्वा घृ॑तमुच्च॒रण्ये॒त्समु॑द्रे ते  
हृ॒दय॑म॒प्स्वन्तः॑। सं त्वा॑ वि॒शन्त्वोष॑धीरु॒ताऽऽपो॑ य॒ज्ञस्य॑ त्वा  
य॒ज्ञप॑ते ह॒विर्भिः॑॥ सू॒क्तवा॒के न॑मोवा॒के वि॑धे॒माव॑भृथ निच॒ङ्कुण  
निचे॒रुर॑सि निच॒ङ्कुणा॑व दे॒वैर्दे॒वकृ॑तमे॒नोऽया॑डव॒ मर्त्यै॑र्म॒र्त्यकृ॑तमु॒रोरा  
नो॑ दे॒व रि॒षस्पा॑हि सु॒मित्रा॑ न आप॒ ओष॑धयः (५०)

सन्तु दु॒र्मित्रा॑स्तस्मै भूया॒सुर्यो॑ऽस्मान् द्वेष्टि॒ यं च॑ व॒यं द्वि॒ष्मो  
दे॒वीरा॑प ए॒ष वो॑ गर्भ॒स्तं वः॑ सु॒प्रीत॑स्व सु॒भृत॑मकर्म दे॒वेषु॑ नः सु॒कृतो॑  
ब्रू॒तात् प्र॒तियु॑तो वरु॑णस्य॒ पाशः॑ प्र॒त्यस्तो॑ वरु॑णस्य॒ पाश॑ ए॒धो-

ऽस्येधिषीमहि॑ समिद॑सि तेजो॑ऽसि तेजो॑ मयि॑ धेह्य॒पो अन्व॑चारिष॒ः  
रसे॑न॒ सम॑सृक्ष्महि। पय॑स्वा॒ः अ॒ग्न आऽग॑मं॒ तं मा॒ स॒ः सृज॑  
वर्च॑सा॥ (५१)

दमेदम् ओषधय आ षट् च॥ [४५]

यस्त्वा॑ हृदा की॒रिणा॒ मन्य॑मानोऽम॑र्त्य॒ मर्त्यो॑ जोह॑वीमि।  
जात॑वेदो यशो॑ अ॒स्मासु॑ धेहि॒ प्रजाभि॑रग्रे अमृ॑त॒त्वम॑श्याम्॥ यस्मै॒  
त्व॒ः सु॒कृते॑ जातवेद॒ उ लो॒कम॑ग्रे कृणवः॒ स्यो॒नम्। अ॒श्विन॒ः स  
पु॒त्रिणं॑ वी॒रव॑न्तं गोम॑न्त॒ः र॒यिं न॑शते स्व॒स्ति॥ त्वे सु पु॑त्र शव॒सो-  
ऽवृ॑त्रन् काम॑कातयः। न त्वामि॒न्द्राति॑ रिच्यते॥ उ॒क्थउ॑क्थे सोम॒  
इन्द्र॑ ममाद नी॒थेनी॑थे म॒घवा॑न॒ः (५२)

सु॒तासः॑। यदी॑ः स॒बाधः॑ पि॒तरं॑ न पु॒त्राः संमा॑नदक्षा॒ अव॑से  
हव॑न्ते॥ अ॒ग्रे रसे॑न॒ तेज॑सा जात॑वेदो वि रौच॑से। र॒क्षोहा॑-  
ऽमी॑वचातनः॥ अ॒पो अन्व॑चारिष॒ः रसे॑न॒ सम॑सृक्ष्महि। पय॑स्वा॒ः  
अ॒ग्न आऽग॑मं॒ तं मा॒ स॒ः सृज॑ वर्च॑सा॥ वसु॑र्वसु॒पति॑रु॒हिक॑मस्य॒ग्रे  
विभा॑वसुः। स्याम॑ ते सुम॒तावपि॑॥ त्वाम॑ग्रे वसु॒पतिं॑ वसू॒नाम॑भि प्र  
म॑न्दे (५३)

अध्व॑रेषु॒ राज॑न्। त्वया॒ वाजं॑ वाज॒यन्तो॑ जयेमा॒भि ष्या॑म  
पृथु॑सु॒तीर्म॑र्त्यानाम्। त्वाम॑ग्रे वाज॒सात॑मं वि॒प्रा व॑र्धन्ति सु॒ष्टुत॑म्।  
स नो॑ रास्व सु॒वीर्य॑म्॥ अ॒यं नो॑ अ॒ग्निर्व॑रिवः कृणो॒त्वयं॑ मृधः॒

वाचः प्राणायं त्वा। उपयाम गृहीतोऽस्यपानायं त्वा। आ वांयो वायवे सजोषाभ्यां त्वा। अयमृतयुभ्यां त्वा। या वामश्विभ्यां माध्वीभ्यां त्वा। प्रातर्युजावश्विभ्यां त्वा। अयं वेनः शण्डाय त्वेष ते योनिर्वीरतां पाहि। तं मर्काय त्वेष ते योनिः प्रजाः पाहि। ये देवास्त्रिंशदाग्रयणोसि विश्वेभ्यस्त्वा देवेभ्यः। उपयाम गृहीतोऽसीन्द्राय त्वोक्थायुवै। मूर्धानं मधुश्वेन्द्राय त्वा वैश्वानराय। मधुश्च सु१ सपोसि। इन्द्राग्नी इन्द्राग्निभ्यां त्वा। ओमांसो विश्वेभ्यस्त्वा देवेभ्यः। मरुत्वन्तं त्रीणीन्द्राय त्वा मरुत्वन्ते। महान् द्वे महेन्द्राय त्वा। कदाचनदित्येभ्यस्त्वा। कदाचनस्तुरीर्विवस्व आदित्य। इन्द्र१ शुचिर्पः। वामं त्रीं देवाय त्वा सवित्रे। सुशर्मा विश्वेभ्यस्त्वा देवेभ्यः। बृहस्पतिस्त्वष्टा सोमं पिब स्वाहा। हरिरसि सह सोमा इन्द्राय स्वाहा। अग्न आयुगंध्यग्रयं त्वा तेजस्वते। उत्तिष्ठन्निन्द्राय त्वौजस्वते। त्रणिः सूर्याय त्वा भ्राजस्वते। आ तिष्ठाद्याः पडिन्द्राय त्वा पोडशिने। उदु त्यं चित्रम्। अग्नेनय दिवं गच्छ। उरुमायुष्टे यदेवा मुमुग्धि। अग्नाविष्णू मुमुक्तम्। परा वै पङ्क्तः। देवा वै ये देवाः पङ्क्तौ। परा वै सवाचमं। देवासुराः कार्यमं। भूमिर्व्यतृप्यन्। प्रजापतिर्व्यक्षुध्यन्। भूमिरादित्या वै। अग्नि होत्रमादित्यो वै। भूमिलोकः सलोकः सुलोकः। विष्णोरुदुत्तमम्। अन्नपते पुनस्त्वाऽदित्याः। उरु१ स१ सृज वर्चसा। यस्त्वा सुष्टुतम्। त्वमग्नेयुक्षाहि सुष्टुतिम्। त्वमग्ने विचर्षणे। यस्त्वा विरोचसे॥

आ दंदे वाचस्पतय उपयामगृहीतोऽस्या वांयो अयं वां या वां प्रातर्युजावयं तं ये देवास्त्रिंशदुपयाम गृहीतोसि मूर्धानं मधुश्वेन्द्राग्नी ओमांसो मरुत्वन्तमिन्द्रं मरुत्वो मरुत्वान्महान्महानृवत्कदा वाममदब्धेभिरु हिरण्यपाणि१ सुशर्मा बृहस्पतिस्सुतस्य हरिरस्यग्नं उत्तिष्ठन्त्रणिणं प्यायस्वेयुष्टे ये ज्योतिष्मतां प्रयासाय चित्तमा तिष्ठेन्द्रमसांवि सर्वस्य महान्सजोषा उदु त्यं धातोरु१ हि यस्त्वा षट्त्वारिंशत्॥४६॥

आ ददे ये देवा महानुत्तिष्ठन्सर्वस्य सन् दुर्मित्राश्चतुः पञ्चाशत्॥५०॥

आ ददे तव वि ज्योतिषा॥

हरिः ॐ॥

॥कृष्ण-यजुर्वेदीय-तैत्तिरीय-संहितायां प्रथमकाण्डे चतुर्थः प्रश्नः  
समाप्तः॥१-४॥



generated on **February 28, 2025**

Downloaded from



<http://stotrasamhita.github.io>



StotraSamhita

| Credits